

新刻張太岳先生文集

新刻張太岳先生文集卷之十五

人主保身以保民辛未程論

天之立君以爲民也人君明於天之意則所以自愛其身者必不輕矣夫以天下之大林林總總之衆而無君則孰與治之人主以其身託於天下君王之上而無民則孰與守之故世之愛戴人主也莫不願其安富尊榮而長爲君者非獨愛其君也有之以爲利故也人主之自愛其身也亦莫不欲其壽考寧固而長爲君者非獨愛其身也有之以爲天下利故也故貴以其身爲天下者乃可以託天下愛以其身爲天

下者乃可以保天下善乎宋儒魏氏之言曰人主保身以保民蓋言人君子民之道也而愚又推之于天今夫父母之于子也上以屬宗祏之重而下以爲昌後之圖也故其愛之也甚殷而憂之也甚切勞之以其所不堪而約之使弗納於邪其爲子者一舉足出言而不敢忘焉惟恐一旦以其身之虧辱爲父母憂故子之愛其身也非以自爲也體父母之愛爲久遠計也大君者吾父母宗子也又天之所甚愛者也賦之以聰明聖智之資而畀之以崇高富貴之寶使天下曾不得睨視而跂望焉佐之以侯王君公之長而

授之以禮樂征伐之權使天下曾不得矯命而雄行
焉其愛之甚何也以爲民也天下有強掩弱衆暴寡
懷知而不以相教擅利而不以相分絕國殊俗僻遠
幽遐不能以蔽德承澤然後舉天下而授之一人號
曰天子使之齊一其亂而均適其欲衣食其饑寒而
拊循其疾苦然後天之意有所寄焉故人主之身非
一人之身億萬垂人之身也天以民之故而愛君而
人主不思愛其身以保民則無乃孤天所以付託之
意乎然而人主之愛其身也與衆庶異不可以不察
庶民之愛其身也常患無以養之人主之愛其身也

常患無以制之何也凡人之情有不得則其欲有節而用不窮無不得則其欲易恣而反至于困憊人主之於天下也奚不得哉其威足以休惕其勢足以奔走可致之欲交於前而可畏之機伏於後始於娛樂終於憂患而民與身始交病矣明主知其然故常有以節之黼黻文章所以養目也而冕旒蔽之不極其觀鍾鼓管磬所以養耳也而黼黻塞之不淫于聰八珍在御側載臭臣所以養口也而一餐告飽不求其餘深宮曲房堯簞緹帷所以養體也而應門擊柝鼓人上堂女史授環彤管紀過不求其娛負宸以居勾

陳管衛所以養安也而蟲飛會盈辨色眎朝日中考
政日昃不遑不求其便張官置吏建侯樹屏所以養
尊也而疑丞後先卜筮左右太史奉諱工師誦詩御
簪幾聲士庶傳誦不求其徇禮樂刑政整齊約束所
以養威也而虞賓在位三恪助祭夏士在庭殷士在
廟饑民在甸夷隸在門不求其同凡所以養之者必
有所制不得極欲譬之百官有司事有所稟不得專
命若然者豈故拘攣齷齪屈萬乘而躬常布之行哉
其節之者正所以愛之也夫物也者所以養性也非
以性養也以性徇物養生者慎之而況于人主乎是

以古之帝王善保其身者使欲不窮于物物不屈于
欲則其欲有節矣欲有節則神定神定則無越思欲
有節則氣完氣完則無過動欲有節則事簡事簡則
無濫費是以惜心溢志之事不滑其和而煩擾格尅
之政不逮于下精爽通于天地而德澤洽于寰宇含
生之倫仰上之德象主之指各便其性安其居處其
宜爲其能三光明六符正羣生遂長五穀蕃殖海隅
日出之邦雕題鑿齒之民莫不重譯貢琛飲衽稽顙
以戴天子天子者端委恭已而南面焉澹然無爲寂
然無聲而萬幾咸理矣中心悅懌四體康豫而壽考

且寧矣故古之聖帝明王在位久者皆歷世百千萬
歲而不化其民就之如日望之如雲愛之如父母而
歸之如流水矯手頓足謹呼祝頌欲萬世而爲君者
豈非保身以保民之明驗歟晚近世則不然以天下
之大奉一人之身而常苦其不足口厭其脆而天下
始有藜藿不飽者矣身厭統綺而天下始有裋褐不
完者矣居厭廣麗而天下始有宵啼露處者矣其弊
至于離志解體而不可收拾則漢唐宋之季世是已
嗟乎彼其身之不保而又何以保民乎哉夫彼之愛
其身也亦無以異于古之帝王而成敗相反榮辱異

趨者古之帝王以養之之道愛之也而彼以戕之之道愛之也故事有順而相賊反而相成美疾之滋毒不若藥石之生我也柔曼之傾意不若奇醜之益德也是以明主不以天之所愛爲樂而以命之靡常爲懼不以天下奉其身而以其身爲天下使其身常有餘而無不足其民常安樂而無患難誠以天之愛我者甚殷而託之甚重故也嘗觀無逸一書叙商周之哲王所以壽永命而配上帝者不外乎抑畏恐懼卑服康功忠臣之愛君固如此也而世乃有曰有天下而不以恣睢命之曰桎梏嗟乎人主之欲保身以保

民豈必若拘儒所云神農憔悴堯瘦臞舜黧黑禹胼
胝之爲勞哉又豈必如術家所云吹噓呼吸吐故納
新熊經鳥伸鴟視虎顧之爲養哉惟不以天下與其
心而已不以天下與其心則內者不出而外者不入
內不出外不入則耳目聰明而心志寧一何事之不
節何功之不成而必曰以恣睢夫使人主無常身而
百姓無常保者必斯言矣抑愚聞之燭火之方微也
一指之所能息也及其燎原雖江河之水弗能救矣
鴻鵠之未孚也可俯而窺也及其翱翔浮雲雖蒲且
之巧弗能加矣人心之欲其幾甚微而其究不可窮

蓋亦若此矣是故善養心者貴豫主敬以存之典學以明之親正人君子以維持之禁於未發制於未萌此豫之道也所以保身保民者也

葬地論

論作於萬曆六年得請歸葬時其堅任已見如此世人談其因畚風水致有僭占者恐先父至愚不如是也懋修言

世言葬地能作人禍福謂葬得吉禳家必興隆得惡地家必衰替若影嚮桴鼓之符應者悉妄也夫人死則精神消散魂氣飛揚其在然僵臥者體魄也辟邪

人寐則陽神出遊觸感成夢當其夢時栩栩然不知身之在於床第也人死大夢也不復覺者也易稱精氣爲物遊魂爲變精魂氣也故能感而適靈變而化物是以人稟正氣之厚及強然而氣未散者類能爲鬼神作禍福若體魄塊然無知與土石等耳雖得吉地豈能使之通靈乎故古不墓祭以爲祖考之神靈不在於是也詩言文王在上於昭於天傳言忠臣義士聖賢之流歿或爲五星之佐故傳說栖神於箕尾肅何降精于昴宿記言骨肉縻于下陰爲野土其氣發揚于上爲昭明薰蒿悽愴此百物之精也神之著

也夫以死者爲有知則其靈在鬼而不在鬼靈旣不在是又安能司人之禍福夫人之情豈不皆欲子孫累世貴顯富厚不絕哉方其生時鬼強神王智能思力能行然欲爲子孫圖慮長久亦有不能盡如其願者歟後枯骸乃能庇覆其後人乎若謂憑藉地靈乃能垂蔭後世凡欲爲子孫計者速歿而已惡用生爲乎書言作善降祥作惡降殃易曰積善之家必有余慶積不善之家必有余殃斯天道也然亦有不盡然者今日家之興替皆係于葬之吉凶則人欲避殃而趨祥者惟取必于地而已又惡用作善爲哉且災祥

禍福之柄既係于地則彼蒼蒼者又將安所司乎天
包乎地地不能大于天災祥善戾之感在天道猶不
可必也而況于地乎上古人死則舉而委之于壑後
乃歸而掩之當其委壑之代人亦有貴有賤有榮有
枯有貧有富有壽有天彼無葬地也是又孰爲之乎
旃裘之國親死則棄之于野經月不視俟虎狼野獸
食盡以爲送終西方之俗盡從火化彼諸國人亦有
貴有賤有榮有枯有生有死有貧有富又孰主之乎
今吳越之間有水葬者魚鱉之腹人之丘隴也彼其
子孫亦有通顯貴盛累世富厚者是又孰爲之乎黃

帝葬于橋山藏衣冠耳堯葬濟陰坎而不墓禹葬會稽不改其列殷湯無葬處王季葬楚山之尾藥水齧其墓見棺之前和而文王不以爲戚魏惠王將葬雪深及牛目反棺而旋改期而葬彼皆身爲帝王而葬禮如此然其子孫爲天子諸侯歷世享國者千有餘年此其尤大彰明較著者也至若匹夫編戶之氓貧窶窮約或掩骼荒丘寄骸叢壘而子孫崛起暴貴者又不可勝數也是遵何術哉上古歿而不葬中世葬而不墓近古墓而不擇地不拘時日今之言相地卜兆者皆叔季希覬之私謬妄無稽之論也且青烏之

書始于郭璞彼固精于其術者葬其親也宜得吉壤
善地而身爲王敦所殺後裔無聞若曰災禍之來有
必不可逃者則人之博求吉地欲以避殃致祥者又
胡爲者哉近世言堪輿者皆宗江右曾楊二姓今江
右之區貴門世族踵相接也乃二姓之後未聞有顯
者彼其祖何獨不求一善地以自庇其後人乎又何
工于爲人謀而拙于自爲謀乎若曰地可遇而不可
求則人亦惟遇之而已何以求爲夫人固有未得吉
地而顯貴已得吉地而衰替者禍福之應然乎否耶
至如江南巨室停喪待地有子不葬父孫不葬祖者

累累淺土或被盜發或因山與訟竭貲求勝至于滅
門逮灰而後已者將來之福尚屬杳茫見前之禍輒
已蒙被吁嗟愚哉可悲也已或曰膏沃之壤華實必
茂剛滷之區根荄靡託物理如此何得言無地脉乎
此殆不然也夫地之美者以其能生物也然使樹枯
木朽株于其間亦未有能生者矣今言地之善者能
使枯骨復華僵屍再起乎若謂風藏氣聚則體鬼安
妥或閤千百年而不化不則有風吹倒轉虫蟻嚙食
之變使灰者體鬼不安禍及子孫此太惑也夫八灰
枯木朽株耳雖不化奚益戰灰之人脂膏草野肉飽

烏鳶而其子孫亦有富貴顯赫者安在其能貽子孫
之禍乎且體鬼無知亦無安與不安也或謂古者建
都立邑皆必據形相水泉故曰我卜澗水東漚水西
惟洛食今民間作一室猶必求向背之利納陰陽之
和何獨陰宅可無擇乎此又不然也夫建邑築室爲
生人計耳故必據形勢相水泉擇向背納休和而後
生人蒙利體鬼無知何所愛憎乎又何關于生人之
休戚乎或謂術家之說徃徃多驗苟無其實安能逆
觀于將來乎此又不然也夫相地之法如射覆然未
有的然知其中之所存者也有地于此使三人視之

一曰吉一曰凶一曰先凶而後吉或先吉而後凶而貴賤榮枯貧富壽夭者生人之所必有也他日出于吉則言吉者驗出于凶則言凶者驗矣出于先凶而後吉或先吉而後凶則言先後者驗矣而世皆傳其驗者不傳其不驗者故謬悠荒唐之說不聞于人而穩度幸中之談獨存于世況術家者流每挾奇以誑俗飾淺以驚愚而流俗之見未有不惑于禍福之說者故其術難窮惡在其爲多驗乎或曰禍福之說固不可以是拘拘爲也然以祖考之遺體委而棄之略不加意于心寧能忍乎子之言葬也如之何曰葬者

藏也欲人弗見也人死則厝之于草莽之中耳乎徙
窮奧茲焉允厥母居險不恐其崩也毋近水澤恐其
陷也掘地爲坎衣周于棺土周于槨反壤樹之一瞑
而萬世不視矣其速化耶吾烏乎知之其不化耶吾
烏乎知之其化與不化又何足休戚耶反哭而虞設
主于室奉神靈而永孝思焉而送終之事畢矣若夫
世之延促家之隆替命也吾何知焉君子強爲善而
已矣矣季子適齊其子死卽葬于瀛博之間深不及
泉其高可隱也掩而號之曰骨肉歸復于土命也若
鬼氣則無不之也無不之也而遂行彼以爲此天地之

委蛇也無之而不可藏也奚以故國之歸勝地之求乎嗟乎若季子者可謂明也已矣可謂遠也已矣

論時政疏

臣聞明主不惡危切之言以立名志士不避犯顏之誅以直諫是以事無遺策功流萬世故嫫婦不恤其絀而抱宗國之憂臣雖卑陋亦廁下庭之列竊感當時之事目擊心懷夙夜念之熟矣敢披肝膽爲陛下陳之伏惟 聖明少留意焉臣聞天下之勢譬如一身人之所恃以生者血氣而已血氣流通而不息則薰蒸灌溉乎百肢耳目聰明手足便利而無害一或

壅閉則血氣不能升降而臃腫痿痺之患生矣臣竊
推今之事勢血氣壅閉之病一而臃腫痿痺之病五
失今不治後雖療之恐不易爲力矣臣敢昧死以聞
臣聞天地交而其道通上下交而其志同爲泰泰者
通也天地不交其志不固爲否否者塞也故天地交
而後能成化育之功上下交而後能成和同之治臣
不敢以久遠喻直以近事言之昔者孝宗皇帝之急
於求治也早朝晏罷親信大臣大臣奏事輒屏左右
近侍之人或日昃不倦臺諫有言皆虛已納之雖甚
狂悖不罪也當此之時百工奉職官無留事德澤有

洽流于無窮一時際會之盛至今可想也今陛下卽位以來二十八年矣自成祖以後歷年之久未有過于陛下者功化之美固宜上追唐虞而近配烈祖乃今陰陽不調災異數見四夷未賓邊塵屢警猶不能不勤宵旰之憂者意奉職者未得其人與抑上下之志猶有所未通耳今群臣百寮不得望陛下之清光已八九年雖陛下神聖獨運萬幾之務無有留滯然天道下濟而光明自古聖帝明王未有不親近文學侍從之臣而能獨治者也今陛下所與居者獨宦官宮妾耳夫宦官宮妾豈復有懷當時之憂

爲宗社之慮者乎今大小臣工雖有懷當時之憂
爲宗社之慮者而遠隔于尊嚴之下懸想于於穆之
中遂巡噤口而不敢盡其愚異日以臺諫不言之故
常加譴責矣是臣下不臣之刑也而至今無一人舉
當時之急務以爲言者無已則毛舉數事以塞責夫
以刑罰驅之而猶不敢言若是者何雷霆之威不可
干神明之尊不可測 陛下虛已好諫之誠未盡暴
著于臣下故也是以大臣雖欲有所建明而未易進
小臣雖欲有所獻納而未敢言由此觀之血氣可謂
壅閼而不通矣是以臃腫痿痺之病乘間而生其大

者曰宗室驕恣曰庶官瘝曠曰吏治因循曰邊備未
修曰財用大匱其他爲 聖明之累者不可以悉舉
而五者乃其尤大較著者也臣聞今之宗室古之侯
王其所好尚皆百姓之觀瞻風俗之移易所係臣伏
覩 祖訓觀 國朝之所以待宗室者親禮甚隆而
防範亦密乃令一二宗藩不思師法 祖訓制節謹
度以承天休而含戾王之尊競求真人之號招集方
術逋逃之人惑民耳目斯皆外求親媚于 主上以
張其勢而內竄奸貪淫虐陵轍有司搏刻小民以縱
其欲今河南撫臣又見告矣不早少創之使屢得志

臣恐四方守臣無復能行其志而尾大之勢成臣愚以爲非細故也所謂宗室驕恣者此也臣聞才者列也養之貴素使之貴器養之素則不之使之器則得宜古者一官必有數人堪此任者是以代匱承乏不曠天工今國家于人才素未常留意以蓄養之而使之又不當其器一言議及輒見逐去及至缺乏又不得已輪資逐格而叙進之所進或頗不逮所去今朝廷濟濟雖不可謂無人然亦豈無抱異才而隱伏者乎亦豈無羅微玷而未廢者乎臣愚以爲諸非貪婪至無行者盡可隨才任使效一節之用況又有卓

卓可錄者而皆使之槁項黃馘以終其身甚可惜也
吏安得不乏所謂庶官燠曠者此也守令者親民之
吏也守令之賢否監司廉之監司之取舍銓衡參之
國朝之制不可謂不周悉矣邇來考課不嚴名實不
覈守令之于監司奔走承順而已簿書期會爲急務
永望風旨爲精敏監司以是課其賢否上之銓衡銓
衡又不深察惟監司之爲據至或舉劾參差毀譽不
定賄多者階崇巧宦者秩進語曰何以禮義爲才多
而光榮何以謹慎爲勇猛而臨官以此成風正直之
道塞勢利之俗成民之利病俗之汚隆孰有留意者

平所謂吏治因循者此也夷狄之患雖自古有之然
守備素具外侮不能侵也今虜騎日久邇來尤甚或
當宣大或入內地小入則小利大入則大利邊圉之
臣皆務一切幸而不爲大害則欣欣而喜無復有爲
萬世之慮建難勝之策者頃者 陛下赫然發奮激
厲將士雲中之戰遂大克捷此振作之效也然法曰
無恃其不來恃吾有以待之乘戰勝之氣爲預防之
圖在此時矣而迄于無聞所謂邊備未修者此也天
地生財自有定數取之有制用之有節則裕取之無
制用之不節則乏今 國賦所出仰給東南然民力

有限應辦無窮而 王朝之費又數十倍于國初之
時大官之供歲累巨萬中貴徵索豁壑難盈司農屢
屢告乏夫以天下奉一人之身雖至過費何遂空乏
乎則所以耗之者非一端故也語曰三寸之管而無
當不可滿也今天下非特三寸而已所謂才用大匱
者此也五者之弊非一日矣然臣以爲此特臃腫痿
痺之病耳非大患也如使一身之中血氣升降而流
通則此數者可以一治而愈夫惟有所壅閼而不通
則雖有鍼石藥物無所用伏願 陛下覽否泰之原
通上下之志廣開獻納之門親近輔弼之佐使群工

百寮皆得一望清光而通其思慮君臣之際曉然無
所闕格然後以此五者分職而責成之則人人思效
其所長而積弊除矣何五者之足患乎臣聞扁鵲見
桓公曰君有疾不治將深桓公不悅也再見又言之
三見望之而走矣人病未深固宜早治不然臣恐扁
鵲望之而走也狂瞽愚臣轍觸忌諱惶悚無已雖然
狂夫之言而聖人擇焉伏惟 聖明少留意于此天
下幸甚

翰林院讀書說

玉堂夫子學統天人道通今古主盟于詞賦之壇樹

幟于文章之府天子嘉其誼重其望選四方文學之士二十有餘人往從之游於是文學之士彬彬然望風景附雲集於函丈之下鼓篋旣竣升席而坐迺進諸文學于庭而告之曰方今治道休隆德化浹洽藝龍稷契比翼于廊廟群臣百寮師師濟濟一時人物之盛蔑以加矣 聖天子迺猶傾念豐芑網羅草澤特選爾諸士登諸詞苑開木天之館以爲藏修聯師儒之任以爲董正其於爾諸士亦有厚望焉若亦知天子之所以儲養之意乎諸文學揖而對曰自代謝繩結文旨肇興謨誥拾于簡編大雅久而不作王風

既萎體格世殊迨至有漢方隆董賈擅其芳聲遷雄
端其渠雋渢渢乎猶有三代之遺音焉旣而淳氣益
漓駢麗乃作濫觴于齊梁猖狂于盧駱唐宋而還風
斯下矣夫鳴盛華國潤色鴻葉非文其孰能爲此也
迺今聖化昭明觀人文以化成天下而某等適遇其
會又有夫子倡于上而起其衰踵作者之芳規嗣前
獻之遺軌此其時矣又何讓乎于是夫子輟然微哂
愀然作色而嘆曰噫吁嘻陋哉測淺者不可以圖深
見小者不可以慮大子實佔俾之儒未聞昭曠之論
是以爲此言也來吾語汝蓋學不究乎性命不可以

言學道不兼乎經濟不可以利用故通天地人而後
可以謂之儒也造化之運人物之紀皆賴吾人爲之
輔相綱紀風俗整齊人道皆賴吾人爲之經綸內而
中國外而九夷八蠻皆賴吾人爲之繼述故操觚染
翰騷客之所用心也呻章吟句童子之所業習也二
三子不思敦本務實以眇眇之身任天下之重預養
其所有爲而欲籍一枝以自顯庸于世嘻甚矣其陋
也且道德者事之實也文詞者德之華也故尚行則
行有枝葉尚言則辭有枝葉訓誥典謨聖人豈殫精
極慮作意而爲之者哉幾微內洞文采外章揚德考

張啓發幽秘不求文而自文耳乃吾見一人焉辨若
懸河藻若春工含吐鄒枚方駕陸謝及考其實曰是
人也德薄人也才辨之流虛浮之黨也若而人者諸
君願爲之乎又嘗見一人焉辨不驚世譽不響俗其
言呐身不勝其衣粥粥若無能及考其實曰是人也
忠信人也君子之徒聖賢之歸也若而人者諸君願
爲之乎何則根本固者華實必茂源流深者光澤必
章是以君子處其實不處其華治其內不治其外夫
厥皇王之緒明道德之歸研性命之奧窮經緯之蘊
實所望于爾諸君也是之不務而文焉從事若曰文

詞而已也豈徒爲爾諸君之累母亦忝天子之命而
虛其望乎又何令名之有于是諸文學赧焉自失蹶
然負牆逡巡而退曰夫不聞建鼓之音者不知拊髀
之足羞也不覩懸蔡之珍者不知燕石之非寶也某
等智識淺昧未燭于理又執固陋之見足已而不問
夫子發以閎深之辭引以大道之要迺今廓然發矇
已昭矣敢不夙夜以求無負于天子之寵命

來鴈說

顧舍人宦居京師有鴈集于邸舍迫就不驚容止閒
暇有宗卿作而言曰休哉瑞應乎夫鴈有陰抱陽候

時眠宿也此其背玄渚之岑寂爲人寰之清微殆以
章瑞表應兆先舍人矣客聞之以問陳先生曰斯言
是邪先生迫爾嘆曰然哉休哉休哉然哉抑猶未循
厥本夫觀物測微揆類表應此瓌士之思也非所以
議于廊廟之幕也宗卿之言過膚不乃甚乎客曰何
爲其然也羽毛得氣先自古而記之矧其耿特之禽
婉儀欽翮引翕駢蹠邕邕肅肅似稊而馴殆漢氏之
所爲協律豫神者也夫子其有遺聞邪先生曰鳥謂
此乎且夫魏鷹鸞雉詭毳殊章今昔之所珍也虞人
負罽椅機入林卽鹿射騷翟飛趺者衆矣虞人靡得

以爲瑞也。類鱗綺甲世之所希也。漁子榆九罟以游江河，河則舛之類詭族，驗喁浮沒揚波，迂纒者夥矣。漁子靡得以爲瑞也。夫物固靈而未必遇，不必靈而傳者矣。此何以稱焉？客曰：然則夫子何以休旃？先生喟然曰：嗟乎！茲難以微喻已。然而茲事雖細，皇風之所槩也。迺余秉藝文之權，惟始終之表惡，可嘿焉。惡可嘿焉，蓋試論之。夷隆時也，機祥適也，顯沒會也，建德章號者，赴時希光，摘盛者，近適雍休，履祉者，附會論世，釋化不越三者而立教也。故事有微而必章，亦有顯而弗揚，彼舍人俊優委蛇，迺矜矜于休誇藉令。

邁督運而立諱朝雖疊珍彙異方跼踖匿沒豈能以
揚芬而擢茂哉客聞之曰惟聖人君役萬物中智以
降則萬物之爲役者也方今天子神聖撫運休光累
葉湛恩渾淳溢于罔極猶遶登不髦俾寓內一技之
士亦得効諝陳慮以黼黻鴻猷是以明庶闡悅遐近
欣欣協氣充牣嘉況龢集熙雪表端滴露飛甘仁康
皎兕靈爵之貢日旅彤庭嘉繇異道之祥盡升清廟
而天子猶樛悒下居下令若曰此大誇靡敕示中外
自今毋得獻而諸福之物郡國什一間上美溢圖謀
者尤不可殫述人人謂致華平之草家家斬致林氏

之騶駼足致施延頸成瘡海內喁喁然無不望上兼
瑞命梃百靈也昔者爵集省第黃霸揚其聲鸞降庭
木蕭起表其政皆遇奸誇之主居偏駁之朝處踈遜
之位猶援物著化垂眎後來而舍人以明體慧質遭
逢隆盛附鴻漸之翼應鳳毛之簡珥筆金閨刷彩瑤
闥目胸天藻手操雲英夫旣以習觀太平之業而沐
浴膏澤曾被其文章矣旣彼蜚鴈烝然戾止其心若
啓可則可儀夫羽毛之應豈必致信符籙然而引興
協思不可少也王生有言世衰道微僞臣虛稱者殆
也世平道明臣子不能宣者也蓋情有積而思宣

美有稽而斯卑性有觸而斯起舍人焜耀希會迺得
以因物託義祓飾趣指播之悠逖以昭其和休焉夫
感上奮內攄盛歸美而輸布忠盡臣子之職也抒道
情以通諷諭藻士之致也推上盡下鋪衍宏變以極
廣遍卿大夫之事也詩云翩翩其羽亦集爰止藹藹
吉士媚於天子又云交交乘扈有鶯其羽君子樂胥
受天之祜茲其所謂丕休也若迺眩異測應以幾寵
授而惟輳況不亦惡乎豈其然哉

義命說

先儒謂義命有正合者若堯舜之有天下仁者之必

壽積善者之獲福是也有不合者謂若孔子不得位
顏淵之早夭是也以愚綜其實殆不然昔者夫子蓋
罕言命至于義則諄諄而不已也何則造化之數陰
陽之變運之所遭有不可以常理測者仁
者不必壽壽者不必仁聖人不必有天下有天下者
不必聖善者不必獲福福者不必善堯舜以聖人而
有天下然其子丹朱商均竟以不肖不能守其業孔
子希世之大聖也歷聘世主而不遇逐于魯厄于陳
漆女曰匪兕匪虎率彼曠野吾道非耶回也屢空夷
齊求仁得仁竟餓且死然保溫之徒暴戾篡奪至縣

行也身爲帝王屢世富厚試使孔顏夷齊與操溫之徒繫德度義不同日而語矣此亦何相去之遠耶然猶有所解者以爲人之稟氣不同或貴賤素定于天故也若夫百里奚在虞而翼亡之秦而秦伯太公涓濱之釣叟也年八十老于磻溪遇文王而爲師尚父公孫弘五十舉賢良不合退牧羊于海濱一朝而爲漢相一人之身耳然成敗異變先後相反也此其于義命合邪否邪世之善惡禍福參差異等其相去不啻什伯者可勝道哉何則大釣播物埶比無垠行或使之止或尼之旣申重之又摧敗之數有不可窮理

有不可解故夫子罕言之也而曲士寡學必使牽合
推測以驗天人之際不亦惑哉雖然命不可必可必
者義也命之所在雖聖人有所不能違義之所在雖
造物者有所不可奪韓子曰禍與福存乎天賢不肖
存乎我在我者吾將勉焉在天者吾何知哉是故孔
子不以厄易其聖顏淵不以窮易其仁伯夷叔齊不
以餓且死棄其義衛且擊之彼將安之升且沉之彼
將順之是故得之不喜喪之不戚生之不貪天之不
怒彼其視富貴福澤貧賤憂戚如波濤之于巨石也
豈以其紛然者動于中哉是所謂義也孔子曰富而

可求也雖執鞭之士吾亦爲之如不可求從吾所好
然哉雖聖人固亦唯知有義而已彼蒙蒙瞶瞶者因
將行險以僥倖而猶忿之流又不達順受之正屑屑
焉與造物者較其多寡責其期效不得則怨憤焚中
屈原以之自沉賈誼以之哭泣申徒狄鮑焦之流負
石蹈海而不悟是何異以蠡測海以丈度天欲以區
區之義上干造化之運不亦誤乎是故學者亦唯循
吾義而已至于命非所可與也或曰今之談義命者
異于吾子之說何哉任數者則曰生死之數窮達之
遇分定于天不可易也任人者則曰天定固能勝人

人定亦能勝天凡此皆一隅之說知其一而不知其二者也辭之稼也耕耘播種人也雨暘豐歉天也雖有神農后稷不能必其歲之豐而田作之功自不可以不力彼任數者不知耕耘播種之在人而一歸于歲任人者不知雨暘豐歉之不常而取必于力作之勤吁或亦甚矣人生而有利害之情有利害之情則不能無推測之智是以紛紛義論而卒無所歸也可勝嘆哉

擬韓信諭燕書

信已破趙用李左車之計使人遺書燕王臧荼曰蓋

聞聖人不違天以立事智者不悖時而建功是以伊尹醜夏歸亳微子去殷卽周彼二賢者皆審天命之歸以決去就之義是以福慶流于無窮聲名著于後世也往者天下同患苦秦豪杰繼起漢王與項羽戮力攻秦懷王約諸將曰先入關者王之漢王先破秦當王關中羽倍約奪漢王關中而王之巴蜀又以私意易置侯王盡王其將相功臣于善地而徙其故主于長沙已又弑之漢王因天下不平發蜀漢之士還定三秦縞素而問弑君之罪天下豪傑雲合響應皆棄楚而歸漢故天命之數歸于漢王愚知所知也魏

王豹背畔無親絕河津距境而自王僕受命徇河北
之未附者涉西河虜魏豹下四十餘城遂擒夏說關
與下今趙又破矣便欲乘勝北首燕路而軍吏皆曰
趙破燕固自宜聽從若其從焉又烏用多殺士大夫
爲也故按兵醴士使人獻愚計于左右僕聞周易垂
知幾之箴兵家審彼已之勢鄭伯面縛嚴王退舍國
小圖大宋以敗亡詩云禍福無不自己求之者願足
下詳計而熟圖焉今爲燕謀者必曰我有易水之險
漢兵遠來勢孤援絕而欲以長技取勝是自速其危
亡者也且成安君有百戰百勝之計阻井陘之固連

燕齊之兵南面而爭權于天下然僕以偏師鼓行而
前不崇朝破趙二十萬衆遂斬成安君泚水上夫燕
之恃以自蔽者獨趙耳昔號破而虞亡韓降而魏懼
前事之不忘後事之永鑒故凡爲足下謀者皆危亡
之路不忠于足下不可用也爲足下計莫若息兵徹
備以身自託于漢僕請爲足下報漢王卽燕封足下
剖符世世與漢終始無極孰與勢窮力蹙坐而待亡
乎計不出此以區區之燕遠託于孤絕垂亡之楚而
欲鼓螳臂之勇以抗乘勝之師僕之所慮蒯丘之壤
不可以圖存成安之事復見于今日矣故願足下詳

張太岳文集

卷之十五

二十四

計而熟圖也危亾之端禍福之機迅如發矢不預揆
之後悔何及

新刻張太岳先生文集卷之十六

辛未會試程策一二三

問易之泰曰天地交而萬物通也上下交而其志同也言泰者固在君臣相與間矣夫泰之時和氣洽而理道昌一有壅闕不足爲泰在昔明君良臣相與開泰於先保泰於後者用何道歟君臣遇合蓋古以爲難而胡以交歟唐虞三代尚矣漢而下有講經論理夜分乃寐者有制諫官隨宰相入議政事者有降手詔給筆札者有請輪侍從直宿以待宣召者亦庶幾所謂交泰歟

嘗伏讀 大誥首君臣同遊 聖謨遠矣頌
盛德者謂開泰莫如 二祖保泰莫如 宣
孝二朝當時謀臣策士耆舊老成侍 帷幄圖
國政以佐致昇平者可悉數歟 朝講之儀
載在 令甲備矣乃又不時 宣召得無煩且
勞歟我 皇上臨御以來講學勤政嘉與百執
事共登太平之理 湛恩威命卽叙遐荒斯亦
交泰之驗矣抑古人有言行百里者半九十且
夫平能憂陂徃能思復泰之旨也願推廣其說
以爲 今日保泰之助

夫君臣之際其天地之交乎是後先天而開泰也相
與定一代之鴻圖後天而保泰也相與建萬世之長
策聚精會神相得而益彰顯志弘業相湏而共濟盛
美溢乎當世聲光流于無窮蓋自唐虞以及 昭代
致理之原古今一揆矣愚請釋泰之義先著君臣之
所以交然後鋪張我 祖 宗休烈可乎易天地交
泰后以裁成天地之道輔相天地之宜以左右民夫
泰之言通也后以裁成輔相爲事蓋身視臣庶而家
視寰宇使元首與股肱弗相聯屬則精神不貫而身
病使主伯與亞旅弗相親比則意氣不洽而家睽故

天道下濟地道上行網縕所合以生萬物交也者天地之所不能違也而況於人乎人臣懷忠信之心抱匡濟之畫孰不欲委質清時結心明主然而冠履之分嚴而宮庭之地隔其情易渙而其勢易踈也明主知其然故首出庶物而下芻蕘兼制四海而先瞽御朝而議政坐而論道示以優體也虛懷而聽造膝而籌所以致親也日晏侍食夜分徹炬所以示渥也辟左右借顏色披衷懷忘忌諱所以盡情也君咨于內曰爾惟勉爾惟鹽梅臣順于外曰斯謀惟后斯猷惟后所以一德也泰九二以剛中應五而五以柔中

虛已以從之此之謂君臣之交故泰之初披茅靈征
與共開焉泰之極艱貞無咎與共保焉二言所爲五
不言所爲二臣道也以仁事爲忠五君道也以任人
爲大二勝其任則五可無爲故曰以祉元吉而已此
之謂君臣交而爲泰也夫都俞咨命喜起廢歌唐虞
尚矣三代相與載在詩書君臣之情猶可想見由漢
而下肇造元勳中興名佐代固有之然率外合而中
疑文具而情闕建武數引公卿講論而責以吏事則
其體失也貞觀宰相入閣議事而隨以諫官則其中
疑也慶曆龍圖天章閣降手詔給筆札而固辭不對

則臣負其君也治平中司馬光請命侍從輪直資善堂夜宿崇文院以待宣召而卒未行則君負其臣也何以庶幾于交泰哉愚嘗伏讀大誥首君臣同遊曰歷代君臣同心一氣立綱陳紀昭示天下爲民造福是以威格天地時和年豐家給人足大哉聖謨我皇祖列聖之所以交羣臣而昌泰運者率用此道矣請陳其略高皇帝延攬英賢廓清華夏所與參密議而贊鴻猷者時則有若基若濂若安若禔若濬若琛若彥良其人焉文皇帝創經備頒綏靖邦家所與商幾務而從征討者時則有若縉若廣若

淮若儼若榮若士奇若幼孜其人焉夫天造草昧于
戈不遑家難勵勦創夷初起而君臣之相與如此
是以神流氣壅天地太和延及羣生施于方外而一
代之鴻圖定矣所謂開天地之泰者非邪列聖相
承久安長治宣弘之際尤稱郅隆章皇帝心存無
逸著舊不遺閣臣則若榮若士奇若溥部僚則若義
若原吉若濬齋宮使殿召對者數矣至于登山
泛舟賜章給饌一則曰同心同德兩無猜嫌一則
曰以遊以豫庶幾古昔又何其歡洽也敬皇帝志
大有爲老成具在執政則若溥若健若東陽若遷臺

省則若文升若大夏若珊 平臺煖閣 召對者數
矣至於 天顏開霽 廟筭周詳 䟽擬則或更數字
或削數語 執奏則或移晷刻 或至累日 又何其披豁
也夫奕葉承平 法守已定 庶事循習 玩愒易生 而
君臣之相與如此 是以神流氣壅 天地太和 克篤
前烈 施于后昆 而萬世之長策建矣 所謂保天地之
泰者 非邪 當其時 主無貳任 臣無隱忠 歡忻交通
而德威宣暢 故論閤霽則功鞅于姬妣 頌熙洽則治
匹乎唐虞 而一時名臣碩輔 幸逢 昌運 亦得以勒
勳德于旂常 垂功名于竹帛 猶歟 休哉 真千載一時

之過也今天子光撫鴻圖祗遵成憲講學臨政
寒暑必親嘉言忠謀納聽靡倦公卿百執事相與勵
翼于下而天子恭已南面以聽之內寧外謐時和
年豐黠虜來庭炎荒奏凱斯亦泰運之再昌已而執
事尚欲聞保泰之說則愚將何詞以獻乎竊以爲欲
登太平之理莫若致隆于上下之交欲隆乎上下之
交莫若憲章乎召對之典夫人情狃于法之所常
行而惕于意之所聞舉今辨色而入日出而視之頃
刻而退矣習則玩玩則不可振故不若間一召對
之爲益也蓋有六善焉問世務一也察材品二也明

德意三也察事幾四也定國是五也激忠悃六也
請得實以祖宗故事熟數于前而執事試垂聽
焉夫人主雖神聖睿智而四方庶務弗能周也錢穀
刑獄各有主者召而問之則幽隱畢達故屯田鹽
法欲計其宜而臨淮洛陽得畢處于下矣邊備虜情
欲定其筭而鈞陽華容得決策于前矣故以閱世務
率作考成可弗眩也夫退而具疏則詞可飾也思
而陳詞則端可匿也惟卒然問之心術立見能否莫
逃故呂震與儀智並對而諛直見楊士奇與蹇義並
對而遲敏見故以察材品則明闇回正可弗欺也

上意猶的也射者爭趨之故諸司奏請必令稽舊章
侍臣以此知上意之在守法召問天下何時太
平朕安得如古帝王大臣以此知上意之在興治
故以明德意則措注嚮往可弗遺也夫造膝而審
語者不可以先傳也從容而納誨者不可以牘盡也
假令議廣詔條而可令多人知乎出殿帖議改
命可外泄乎故以審事幾則轉移變化可弗窺也衆議
畢集可否易消不惟僉夫與正士殊科卽君子意見
亦有同異如移師彰德楊榮以爲是士奇以爲非舉
伏伯安爲使蹇義以爲可原吉以爲不可黎利請立

陳氏後張輔寒夏曰勿許榮士奇曰許之此其心皆
體國而所見各殊惟折以宸衷則衆論一矣故以
定國是則盈庭聚訟可弗亂也夫入侍帷幄出
奉乘輿內寄腹心外資謀斷人人自以爲親已矣
有君如此其忍負之祖宗朝相與盛事藏在
秘府愚不得徧觀卽如泰和長沙華容之所私錄
毗倚眷顧迄今誦之猶爲感動况親當其盛者乎
故以激忠悃則御恩幸遇可弗負也斯六善者皆已
事之明驗益于法制常行之外而時用吾鼓舞不測
之權故聖智日益觀聽日新賢才樂爲之用而天

地常泰且初雖似勞久而情誼洽彌見其適初雖似
煩久而要領得彌見其簡又何煩勞之有愚又聞
二祖諸臣皆從事乎草昧勦間而宣德弘治所親
禮乃其輔導之舊蓋未登大寶而相與已素矣且
孝宗十載始召諸臣面對其召也雖內侍不
及知夫恭默思道是惟不言言乃雍沉幾觀變
是惟不行行乃果宸衷獨發固不可測也今上
勵精圖治日臨羣臣益明習國家事且將舉祖宗故
典以備熙朝盛美蓋有待焉草莽愚生傾心拭目於
是舉也久矣若釋此而他求保泰之道則愚何知焉

問王者與民信守者法耳古今宜有一定之法而
孟軻荀卿皆大儒也一謂法先王一謂法後王
何相左歟我國家之法鴻纖具備於古鮮儷
矣然亦有在前代則爲敝法在熙朝則爲善
制者豈行之固有道歟雖然至於今且敝矣宜
有更張否歟或者謂患不綜覈耳古今論綜覈
者莫如漢宣帝然當其時亦五日一視事矣僞
增籍者受賞矣若此者可謂行法歟宣優于文
豈爲通論而或者亟其歎服抑宣美元似知大
體而或者深刺其非孰爲當歟夫欲綜覈則情

僞有不可窮更張則善制有不必要變誠不知所
宜從也願熟計其便著于篇

法不可以輕變也亦不可以苟因也苟因則承敝襲
舛有頽靡不振之虞此不事事之過也輕變則厭故
喜新有更張無序之患此太多事之過也二者法之
所禁也而且犯之又何暇責其能行法哉去二者之
過而一求諸實法斯行矣執事發策考荀孟之異論
稽國家之舊章審沿革之所宜求綜覈之實效愚
嘗伏而思之夫法制無常近民爲要古今異勢便俗
爲宜孟子曰遵先王之法而過者未之有也此欲法

先王矣荀卿曰略法先王而足亂世術不知法後王而一制度是俗儒者也此欲法後王矣兩者互異而苟爲近焉何也法無古今惟其時之所宜與民之所安耳時宜之民安之雖庸衆之所建立不可廢也戾于時拂于民雖聖哲之所創造可無從也後王之法其民之耳而目之也久矣久則有司之籍詳而衆人之智熟道之而易從令之而易喻故曰法後王便也徃代無論已 明興 高皇帝神聖統天經緯徃制博稽述采靡善弗登若六卿倣夏公孤紹周型漢祖之規摹憲唐宗之律令儀有宋之家法采勝國之曆

元而隨時制宜因民立政取之近代者十九稽之往
古者十一又非徒然也卽如筭商賈置鹽官則桑孔
之遺意也論停解制年格則崔亮之選除也兩稅三
限則楊炎之田賦也保甲戶馬經義取士則安石之
新法也諸如此類未可悉數固前代所謂陋習敝政
也而今皆用之反以收富疆之效而建昇平之業故
善用之則庸衆之法可使與聖哲同功而況出于聖
哲者乎故善法後王者莫如 高皇帝矣 天府之
所藏掌故習之所頒有司守之大小相維鴻纖具備
自三代以來法制之善未有過于 昭代者也然今

張太岳文集

卷之十六

九

南二百餘年耳科條雖具而美意漸荒申令雖勤而實效罔獲屯田興矣土曠猶故也陂政舉矣蜚輓猶故也清勾數矣乏伍猶故也積粟課矣空廩猶故也豈法之改而不可行哉故議者謂宜有所更張而後可以新天下之耳目者愚竊以爲不然也夫高皇帝之始爲法也律令三易而後成官制晚年而始定一時名臣英佐相與持籌而筭之其利害審矣後雖有智巧茂以踰之矣且以高皇帝之聖哲猶俯循庸衆之所爲乃以今之庸衆而欲易聖哲之所建豈不悖乎車之不前也馬不力也不策馬而策車

何益法之不行也人不力也不議人而議法何益下
流壅則上溢上源窒則下枯決其壅䟽其窒而法行
矣今之爲法壅者其病有四愚請頌言而母諦可乎
夫天下之治始乎嚴常卒乎弛而人之情始乎奮常
卒乎怠今固已怠矣幹蠱之道如塞漏舟而今且泄
泄然以爲母擾耳一令下曰何煩苛也一事興曰何
操切也相與務爲無所事事之老成而崇尚夫坐嘯
畫諾之惇大以此求理不亦難乎此病在積習者一
也天下之勢上常重而下常輕則運之爲易今法之
所行常在于卑寡勢之所阻常在于衆疆下挾其衆

而威乎上上恐見議而畏乎下陵替之風漸成枯骨
之勢難使此病在紀綱者二也夫多指亂視多言亂
聽言貴定也今或一事未建而論者盈庭一利未興
而議者踵至是以任事者多却顧之虞而善宦者工
遁藏之術此病在議論者三也夫屢省考成所以興
事也故采其名必稽其實作于始必考其終則人無
隱衷而事可底績今一制之立若曰著爲令矣曾不
崇朝而遽聞停罷一令之施若曰布海內矣而畿輔
之內且格不行利害不究其歸而賞罰莫必其後此
病在名實者四也四者之弊熟于人之耳目而入于

八之心志非一日矣今不祛四者之弊以決其壅既
其窒而欲法之行雖日更制而月易令何益乎夫漢
宣帝綜覈之主也然考其當時所行則固未常新一
令創一制惟日取其祖宗之法修飭而振舉之如曰
漢家自有制度耳且其所任魏相最爲稱上意者亦
未嘗以已意有所論建惟條奏漢家故事及名臣賈
誼晁錯等言耳當其時雖五日一視事而上下相維
無苟且之意吏不奉宣詔書則有責上計簿欲具文
則有責三公不察吏治則有責其所以振刷綜理者
皆未嘗少越于舊法之外惟其實事求是而不采虛

聲信實必罰而真偽無眩是以當時吏稱其職民安
其業政事文學法理之士咸精其能下至技巧工匠
後世鮮及故崔寔稱其優于孝文而仲長統極其嘆
服荀悅論美元帝而李德裕深以爲非良不誣矣然
則今之欲求治理者又奚以紛紛多事爲哉 高皇
帝畢智竭慮以定一代之制非如漢祖之日不暇給
也 列聖相承創守一道非有武帝之紛更中變也
百官承式海內嚮風非有許史霍氏之專制撓法也
成憲具存 舊章森列 明君賢臣相與實圖之
而已毋不事事毋泰多事祛積習以作頽靡振紀綱

以正風俗省議論以定國是覈名實以行賞罰則
法行如流而事功輻輳矣若曰此漢事也晉曰爲唐
虞爲三代則荀卿所謂俗儒也

問古之君子興建鴻業聲施後世者世必目之曰
英雄曰豪傑是二名者豈非偉丈夫之通稱歟
乃論著家又各析其名義匪直英雄與豪傑有
辨卽英與雄亦從而分之謂有英而不雄者有
雄而不英者其說然歟否歟歷代英雄豪傑見
於史冊者不可勝舉然亦有卽標題爲號者如
閻之四英周之七雄戰國之四豪漢之三傑其人

材行聲績果皆不愧其名歟將其人品又各有
高下歟近世儒者謂真正英雄必自戰兢中來
又謂豪傑未必聖賢聖賢必爲豪傑而古唯三
聖人足以當之則其說豈不尤異歟夫英雄豪
傑美名也士以是稱可以爲難矣乃儒者猶雌
黃之不少假則尚友者何所取則歟試言之以
觀其志

古環傳奇特之士樹鴻業于當時垂鴻稱于後世者
豈獨其才之過人哉蓋尤係于養矣養有淺深則其
才有純駁才有純駁則其建立有鉅細才得于天者

也養繇于人者也才欲恢欲宏欲奇欲偶養欲微欲
深欲精欲奧與兩者若相反焉然微深精奧者所以爲
恢宏奇偶也故古之善養才者不恃其得天之異而
勉其修己之純闢如虺虎不敢以言勇懼其剛之易
摧也錡如鎔邪不敢以言割懼其鋒之易折也神若
著蔡不敢以言勇懼其筭之易窮也力若九牛不敢
以言任懼其趨之易躓也煉之至精而歛之至密韜
之至深而蓄之至厚夫然後其神凝其氣專發之不
可禦蒙之不可窮矣人徒見其事業聲稱照耀今古
抑孰測其所以致之者哉今夫兩閭清淑之氣麗于

形象在天爲星辰在地爲河嶽在土石爲寶玉在飛走爲麟鳳在人則爲英雄豪傑是英雄豪傑者固均之二氣之間鍾人倫之首出者也然有辨焉劉孔才云聰明秀出謂之英膽力過人謂之雄有英而不雄者有雄而不英者智勇並異則英雄兼焉淮南解曰才過千人謂之豪萬人謂之傑此英雄豪傑之辨也總之皆以其智力絕殊不可以尋常尺度論耳自古迄今所以樹立人紀綱翊世運決大疑排大難建大功立大節必此四人者爲之然而品格異焉不可不察也夫人非無才之患有才而能善用之爲難四人

者其機智勇決旣與凡民迥異則未免過于自恃而
有眇焉輕天下之心紛紛未交而謂幾不足與晰也
艱阻未識而謂功不足與圖也考衷叩蘊則固未有
灼然先幾之見確然不可奪之守一挫其銳則折北
而不振矣是純乎氣者也夫千鈞之弩不以鼷鼠發
機萬石之鐘不爲尺挺成響物理有分感應有節不
可易也四人者負其才具則不能安于無事往往不
勝技藝曲牽于應世之迹而輕試其所長是以見彈
求鴉或欲速而不達投珠抵鵲或見小而妨大此與
虛憍恃氣者固有間矣然而其疆可撓也其躁可激

也其驕可乘也其欲可參也以綜天下之務則得失
參焉不可與謀成也是識不能勝其才者也等而上
焉嚴乎內外審于施應既不沾沾以自喜亦不汲汲
以從時自度其智可與幾也將謂天下之故非已莫
能矚耳自度其勇可與斷也將謂天下之事非已莫
能成耳其晰微制決持危定傾能于轉盼咄嗟之間
而豎俶儻不羣之績此四人者之能事也然而其光
外朗其氣內盈尋之不易其方而測之可窮其際是
兼得乎養而未盛者也品之優也等而上焉智周萬
物而不自用其明勇蓋萬夫而不自任其力隨事而

應弗膠于成心循理而行弗牽於功利朕兆未萌法
象未著淵然獨慮而百姓莫見其迹不世之功永世
之澤蔚然丕建而百姓莫知其然天下所謂智勇
者舉莫得而望焉此朱子所謂真正英雄豪傑而聖
賢者也品之上也愚嘗以是沉觀古今之迹總挈人
物之量其英雄豪傑優劣高下之辨大都不越此四
者顧更僕未易數也姑卽明問所及者言之周之衰
也王綱弛維諸侯力政于是縣宇分裂稱爲七雄戰
國之末貴臣握柄資瞻游談于是列國公子號爲四
豪漢高坐屈羣策以建纂堯之業則張良蕭何韓信

三臣者皆人傑也而漢之得天下由是焉昭烈知人待士以嗟炎劉之燼則諸葛亮董允蔣琬費禕四子者皆英偶也而蜀之存亡因之焉卽史傳所紀固各有英雄豪傑之目矣試卽前四者之等以槩此數子之長則七雄者彼哉無以議爲也平原卑卑不及格矣孟嘗春申廣交養名背公成黨奸人之魁耳信陵威信于彊秦義存乎弱趙急人之難不居乎功蓋猶有烈士之風焉惟其挾威震主內疑外忌則君子所不道者其在三四之間乎三傑遭際興運各奮才智推轂漢祖卒成帝業信乎爲代寶矣子房英略蓋世

而貌若處子功成身退超然遠引比之何信爲最優
焉三品之上者乎董允蔣琬費禕端謹節士耳雖事
無過舉然天之所授非特異也有秦英稱矣孔明望
重于臥龍力抗乎漢嗣君臣契合投袂匡時至于出
師獻納之言寧靜澹泊之語出處議論庶幾王者之
佐焉蓋入其域而未優者乎之數于者皆以蓋世之
才際功名之會雲蒸龍變鷹揚虎視考其平生之所
建樹可謂俊偉卓犖矣然其中或得分有多寡賦才
有兼偏細節多疎則不能無負俗之累氣質偏勝則
不能無瑕類之存蓋所謂衆材之尤也非衆尤之尤

也必也其大禹乎鑿龍門排伊闕別九州宅四隩績
固偉矣然且不矜不伐而莫與爭功愚夫愚婦而凜
若勝予彼視地平天成于吾身何有輕重也其周公
乎除兇殘驅虎豹立綱紀陳禮樂功莫大焉然且吐
哺程髮下白屋之士不驕不吝履赤舄之安彼視勝
殷遺劉于吾心何有加損也其孔子乎學殫累世而
不以智聞力抉門關而不以勇聞在鄉黨而恂恂居
朝廷而唯謹固儼然儒者也及其却萊兵反鄆謹墮
三都誅正邪卽慷慨奇節之士決背奮臂極力而不
能辨者乃不動聲色徐引而振之旣振油然而退

矜容無盛氣此豈世之君子所可與量尺寸哉蓋
三聖人者受之于天既皆得夫渾淪磅礴之氣修之
于已又皆懋夫沉潛純粹之學其所基者密而宥而
所蓄者完而固也故能決夫疑排大難建大功立大
節紓徐委蛇而不見其作爲之迹嗟夫非天下之至
聖其孰能與於此哉故朱子謂真正英雄皆自戰兢
中來而聖賢豪傑唯此三聖人足以當之信不誣矣
然則世之君子受天地特厚之才而有志于三聖人
之事者顧可不慎所養乎養之道無欲其本也慎
動其要也析義窮理沉幾察微瑩乎若夜光之內朗

洞乎若止水之獨鑑所以養智也抑其彊陽銷其客
氣深乎若彊弩之握機韜乎若寶劔之歛鐔所以養
勇也尸居而龍見淵嘿而雷聲聖人之事也卽史冊
所載環偉奇特之士猶將姑舍是焉而况其下者乎
蓋嘗聞紀渚子之養關鷄也始也虛憍而恃氣馴之
十日則應景嚮矣又十日然後其德全而異鷄無敢
鬪者矣此養德之喻也故英雄豪傑之從事于學也
紀渚子之養雞則幾矣

新刻張太岳先生文集卷之十六

新刻張太岳先生文集卷十七

送起居館講太寶箴記事

萬曆四年二月二十九日 上於 文華殿背誦大

寶箴先是 上以大寶箴爲書字影格臣因奏此文

甚切於君德治道 皇上勿徒書寫須熟記其詞又

勿徒記誦須通曉其義乃爲有益上以爲然臣乃爲

註解一篇以進至是日 上御文華殿 召臣至

御座前 上起立高舉大寶箴一冊面授臣臣受冊

北面立 上高聲背誦一遍一字不差又 玉音清

圓悠遠餘響繞殿誠 萬壽之徵也背畢臣又進議

一一陳說大義 上皆洞其微旨所引瓊宮瑤臺積
丘酒池開羅啓祝援琴命詩等事悉知其顛末講至
縱心乎湛然之域一條 上曰此不過言人當虛心
處事耳臣因舉手賀曰只虛心二字足以蔽此條之
義矣夫人心之所以不虛者私意混雜故耳如水本
至清以泥沙溷之則不清鏡本至明以塵垢蔽之則
不明人主誠能涵養此心除去私欲如明鏡止水則
好惡刑賞無不公平而萬事理矣 上曰然是時左
右侍臣聽之無不欣躍稱慶者次日 特賜臣銀八
寶二十兩以酬昨日講讀之勞

送起居館論邊情記事

先是薊遼總督梁夢龍塘報虜酋土蠻大舉寇遼東
輔臣張居正以警報封奏 上遣文書官命居正等
擬 旨諭兵部議驅勦之策居正等入奏言九月初
間有北虜俺答部下頭目恰台吉差人於土蠻營中
偵知土蠻欲糾衆向遼講求貢市臣卽馳語總督梁
夢龍令其再偵的實多方設備偵示遼東總兵李成
梁巡撫周詠虜若糾大衆至勿輕與戰但堅壁清野
使之野無所掠虜氣自挫又使梁夢龍親率師東行
發勁兵二枝出山海關爲遼東聲援令薊鎮總兵戚

繼光選精銳乘間出塞或擣其巢或邀其歸以撓之
今據報各官具如臣指梁夢龍已東駐山海遣叅將
許汝繼楊果出關截殺戚繼光移駐一片石伺間邀
擊遼東收保已畢虜以十月初二日至寧前向口口
地方此中地狹人稀虜衆無所掠勢不能久旦夕必
已退遁今勅本兵姑議驅勦已後相機別議且彼
中戒備頗嚴諒無疎失伏惟 皇上少寬聖懷 上
曰先生費心處置朕知道了乃叩頭出

題竹林舊隱卷

竹林者萬子榮故居也萬子生於潞陵長待詔宦者

署出爲益內史是時宗藩中益殿下最爲親賢好學而萬子以修潔自將又聰慧穎悟以故得幸於王三年以類奏走京師而余與萬子同鄉里旣相見道故舊勞苦如平生懽已迺向余嘆曰吾聞君子樂其所生而有情之物思不忘本故楚客越吟莊生愛似其致一也吾少有烟霞之想方其隱居修竹之間圖書自娛蓋自謂與此君終焉爾竹堅真有常性貫四時凌霜雪而不改又盤據糾結固守其所得君子之止焉而吾輕去父母親戚遠宦他國舊業日蕪枝柯零落竹不負吾而吾負于竹多矣能無思乎張子曰若

是則子之愛竹是得其形而不得其神者也夫得其形則視天下之物皆物也得其神則視天下之物皆我也故竹微物而昔之君子貴之皆意有所愜焉者也夫外直而中洞音中律呂者虛也發明隕籀筠然葱蒨者文也嚴霜下零衆草俱萎寒色森森與貞松而並秀者節也君子取其虛以宅心可以宏翕受之德取其文以飾聽可以煥至德之光取其節以勵行可以堅獨立之操斯所謂得其神者也得神而形可忘矣且聖人不櫻情於物而委心以任去留故以天地爲寄跡以四海爲一區若子之言必處瀟湘之間

日與其蒼翠檀欒者居而後爲友也毋亦與昔人之
所有者異乎萬子矍然曰遠哉先生之談吾乃今之
得與竹爲友也吾向者之言因既聞至論請終身服
之

跋葉母還金傳

余讀史竊高楊震管寧之爲人及至京師遊薦紳諸
公間又間有葉母還金事還金至小節非葉母母儀
婦訓之炳然者而士大夫咸極稱之何哉楊管不作
而介然取舍之操迺出于婦人云爾然方其臨蒞不
顧逡巡退讓之時豈自知當播譽於人垂光簡冊哉

寧以貧困義不苟得蓋所謂無欲而好仁者仲尼稱人之爲善欲蓋而彌章也豈葉母之謂邪顯揚其親美以崇孝中書君之謂邪

跋會稽徐珊四寶編

楚人太岳子曰余嘗爲翁張君傳擬韓氏之毛穎已而火之蓋文以屬詞切理宣揚道德者也司馬長卿爲上林賦借子虛烏有以諷世主猶不免取誚俳優況復作謎語以誇侈藻繢者哉自退之作已見笑於子厚其他壽光先生草華諸傳瑣瑣可勝道哉然其稱引託喻謫以爲諷抑亦韓製之旁流也墨士故自

以文爲戲觀者亦且以小喻大文章家所不廢也余
于徐氏四寶編欣然而存之

方氏建水射銘

黃山之源東流爲淇潭之水溉田千畝畝俱五鍾大
姓者居焉爲方爲夏爲汪爲李爲姚爲閻咸先世名
族也而方氏居北岸岸受水衝蓄廬殫爲河矣居人
病焉謀爲石岸以射水勢而工鉅莫爲任者潯溪方
君端獨慨然曰一勞者永逸利百者功建其在余乎
乃鳩工伐石舉致其側水潦舉事辭業重累上爲大
道延袤數里於是依北岸者百餘家爲莫居焉起嘉

靖丁亥迄乙卯工乃落成蓋費雖不貲而百世利矣
夫修身潔行雉膏龍霖以博濟天下者卿大夫事也
散財樹德拯患急難以利一鄉者士庶人事也今豪
右侈族以其財雄里閭卽不翼其施戾足矣能建利
捍患於人耶快于自潤恡于及人人情也若方君者
詎不足多乎方君從子五溪大濂俱從余游而以君
建水射大功祈余爲之紀方君聞之矍然曰細行何
足煩大君子記其深衷不伐如此夫不憚勞費建百
世之利近於義積而能散近於智不矜其功近於厚
信哉方君居士庶人而有卿大夫雉膏龍霖之功者

乎余嘉其詞而爲紀系之銘曰

爲魚淮陽化鱉秦中誰言柔德其害靡窮層崑嵯峨
巨石龍從障彼狂瀾委伏而東昔也沮如今焉崇墉
高原煦煦禾黍芄芃千萬斯年不斁不崩誰其營之
方君之功

玄海子著書評

楊子雲白首著太玄經殫極心力而世無有稱之者
獨桓譚以爲必傳今人讀其書謂如墳典丘索談藝
者必歸焉而不知當時人以爲祇足覆瓿云耳人情
好慕遠古而忽儔類信習熟而駭所希聞彼親見楊

子雲名位不顯又所著作非淺見諛聞者所易窺測其見詆訶宜矣微獨子雲卽巖穴之士殫精神於旁索者不以窮約自發憤者哉其堙滅而無稱者又可勝道哉玄海子邇世絕俗不交當世而好著書至老不倦所著有太平本論玄叩集余讀太平本論上窮皇農中述道德之意下極肖翹之變旨趣深矣讀玄叩集又窮極幽隱鉤致深遠索玄珠於象罔叩寂寞而求聲吁又何其閎覽博詣君子乎他作鑄詞險峻至不可句又焉能究其旨歸則世之知者蓋亦希矣嗟乎玄海子慎勿輕出其書世有博詣遠觀如桓譚

者將必有傳之後世之先見而何計世俗之知與不知哉

書胡氏先訓卷

吉胡正甫氏出其高曾祖遺訓余觀之稱慕古昔率中規矩以守道居約箴誠子姓而歸本於質厚蓋兩翁生先朝全盛時道化汪濊故皆知節誼敦實而無夸毗市利之習夫人處世譬之尺蠖矣食蒼而蒼食黃而黃故啜醇者之不能爲漓與處華者之不可返質卽賢者猶將移之況漸漬於繇俗者乎正甫行修而文復恬於世好最爲卓越矣然未知真純簡素便

可比蹤先世石璞不能不散而爲器玉不能磨琢爲圭璋瑚璉彼其爲圭璋瑚璉也則亦遠於璞矣余從正甫觀遺訓蓋累歎焉又別出其父晴崗翁手澤一卷言質直率類其二祖而于聖賢之學尤惓惓焉胡氏世有儒宗矣昔陽明先生昌學於東南學士大夫或頗有棄而不信而間巷之儒油然宗焉如是者何哉蓋膏雨之洽潤非有所擇也物則有受弗受矣受則羊斟糴華實弗受則芘乘之財日就槁矣余與正甫論學最契謂其出于羅念菴先生余素所傾向者然不知正甫更承其家學如此也駒本渥洼而良樂

又從而拂拭之欲不千里得乎

祭張龍湖閣老文

嗚呼自吾鄉李文正公之歿也數十餘年而公與惟
公實鍾衡湘之秀秉箕尾之精旣而擢冠禮闈翱翔
藝苑以至爰立作相望實炳燁日有聞矣而顧止於
是胡造物者之於公也旣與之以勃鬱磅礴之氣而
復奪其期頤耄耄之年耶竊嘗見公議論天下大計
謀思如江河之不窮早見如龜策之不爽意公久於
其位必當以修攘之策靖四方使朝廷尊榮邊圉寧
謐見公之立于朝正色率下無所假借意公久於其

位必當以剛直之節肅百僚使端士不懼懦夫能立見公之學術淵深博聞強識意公久于其位必當以帝王之學沃君心使禮樂可興道化滂洽而今皆已矣嗟乎公之心未可一二與俗人言也公之自留都入相也今天子拔之於疎遠之中而置諸左右公之知故莫不爲公喜而公獨愀然不見其忻豫之容賓客在門輦感疾首語及時事輒扼腕而於邑此其志意豈在富貴賢豪間耶嗟乎難成者事也難得者機也以公之碩德弘器負海內之望者二十餘年曾不得大展於時乃竟顛頽以隕也謂之何哉鳳翔等

于公有同鄉之情有分職之任或與公爲交遊或爲
公之晚進皆思畢慮竭愚陳其所知以獻於公少裨
萬一豈謂公遽止於是而已哉嗟平生之有死古之
與今猶旦暮耳何足悲乎所悲者不悲公之死而悲
公之志未伸不悲公之一人云亡而悲夫後學之無
所師承也嗚呼已矣幽明之誼永乖隔矣漫漫修夜
寂寂高堂言寄于衷淚寄于觴精爽伊邇昭格洋洋

祭朱公文

導漾挺靈大別儲精葱蘢蘊結鬱生人英惟公幼懷
瑰璋早繼簪纓執戈胄甲腹心干城心馳瀚海志勒

燕銘遘茲時之偃武兮爰嘉遁以辭榮弋冥鴻于碣
石兮招黃鶴乎秋冥遙弭節于夢渚兮長絕意于青
門惜猛志之旣歇兮終崛起于後昆篤生侍御乘時
策名分符嶺表攬轡都亭猗猗令望赫赫厥聲懷陟
岵之遐思兮冀瓜期之旣及秣晝遊之聽馬兮振班
欄以晨夕何寸草之方殷兮傷大椿之遽靡馳遙想
於重雲兮結長悲于萬里嗚呼哀哉公厭世兮釋累
而離氛驟架蒼螭兮謁雲中之君仙輻香而難卽兮
靈御儼其繽紛羨華胥之不返兮二人生之長勤彼
生死同於旦暮兮又何脩短之足二某等追隨今才

托公餘芬莫能走哭于賓位兮世訃音之遠聞寄愁
心於楚水兮託哀響於江雲瑤席兮玉璫桂醕兮蘭
馨淪江兮薦瓊纈止兮燔薰靈之來兮不來使我心
兮殷殷

祭兵部侍郎傅公文

嗚呼我公邦之干城作鎮大藩式武且文獫狁匪茹
逼我畿輔帝乃震怒陳師鞠旅帝曰嗟咨疇贊予征
四岳咸薦來公于京肅肅我公帝命是共星言夙駕
沐雨櫛風公旣戾止百勞萃止旣總國儲戎務是理
惟此大任咸集于公寧居不遑夙夜在公公病于邸

手足萎薨人曰盍歸公曰效死歲夏六月公遂以亡
嗟嗟昊天奪我邦良公志未遂公身先俎大難未夷
公歸何所不悲公死悲時之艱匪鱣匪鮪曷逃于淵
死者永寧生者長戚心之憂矣疾如首疾靈弗南發
祖道悠悠奠公一觴聊以寫憂

祭勅封翰林檢討陳公文

嗚呼自綺等得侍吾師陳先生聽其語未嘗一日不
在岷峨錦水之間者念翁在也然翁聞先生之欲歸
輒唏噓不樂馳書戒使拒而尼之先生徘徊于邑欲
去不克遂者數年於茲故翁之沒也先生崩慟殞絕

嘔血呼天不能自止誠憾夫夙志之有違而痛乎追
養之莫逮也夫父子之愛天性也人之于子莫不願
拳踞偃僂拊之膝下袒裼鞠脰就之朝夕然世願有
近之而愈戚遠之而愈欣者將資父之義重於承歡
顯揚之美賢於色養耶嗟乎身無衡命順之而已苟
順其志生則悅之死則安之夫先生爲講惺近臣有
論思之責有調護之寄任大望重如此翁能以私愛
奪之否乎第令先生奮然決一旦之意不顧違親以
快其志可矣翁悅之否乎不悅則必有拂鬱壅閼之
懷焉翁能以壽考終其天年否乎若先生者蓋所謂

抑志以安親違心以順命者也而又何憾於心乎某
等遊先生之門悲先生之志聞翁之計蓋切悼痛
雪涕而興哀焉然又知翁之心以先生之能順其意
爲安且悅也故辭香陳詞告翁之靈并以爲先生解
嗟乎翁而有知諒亦無逆於斯言乎

祭少司成晁春陵文

嗟乎卜商失明於西河濬沖鍾情於一慟憂能傷人
古今一揆豈不悲哉先生蒼顏古貌長身玉立眊其
狀貌度百歲人也及傷其子吉士君之亡也結念鬱
悵遂成內患形色衰色憊神氣黯然不五六年而先生

亦以長逝矣。豈溺情結愛雖通人猶有所蔽耶。嗟乎。吉士君賢子也。夫芝蘭玉樹不幸殞折於風霜。卽行道者猶咨嗟歎憶。乃一旦奪之階庭而委之泥塗。自非無情能不悲乎。遂使文梓先摧。喬林繼萎。矧讀書萬卷而弘濟未裨。積德百年而駿業中阻。嗟夫先生安得不以是悲其子。而人安得不以是悲先生哉。初先生以弘衍該博。蜚聲藝林。縉紳大夫鴻儒學士無不延頸舉踵。願托末交。而先生雍穆渾潛。恂然若無能者。其教成均。僅數月耳。六館師生以數百人至。衆也。而領先生之德者。口噴噴不休。使天畀之以年。其

化導莫可量矣乃今竟爾爾豈意先生之鉅者旣未
盡布而其細者乃亦不克終耶嗟乎先生可悲也已
余二人者以承乏繆董教胄之役而六館師儒又先
生夙所甄陶者方且欲咀先生之餘潤以沾溉後生
播先生之遺風以興起善類而先生不可復作矣雖
欲相與協和友善以共圖菁莪棫樸之化尚於誰賴
哉是日也有牲在俎有酒在竿予以奠之總帷之下
神其來歆我悲以寫

祭李封君文

文梓貞幹生於鄧林豈繁材良植根則深渥注龍種

育必神駒紛紛凡匹厥類則殊氣厚期昌德厚期祉
赫赫京兆維公之子吁嗟我公古之逸人賁於丘園
頤志含真汾沮崇儉考槃樂道潛德之光閔而愈耀
乃生賢哲作瑞家邦譬彼九苞翻飛鳴陽揆藻詞林
珎筆塢禁崇階荐躋令聞藉甚祿養方隆天休載篤
方期大椿遠悲風木陟彼燕臺以望白雲白雲不見
哀計空聞嗟嗟公平食於後人不於其躬天之報公
孰曰不崇富貴福澤旣祺且壽公之受享孰曰不厚
乘烟馭風駕螭駢虬遊於華胥其樂悠悠某等昔與
令子比翼詞垣誼雖友朋情均弟兄死喪之戚兄弟

孔懷辦香陳詞維以興哀

祭封一品李太夫人文

夫鞠育顧復者有生之所共念力不副志者賢哲之所歔歔故有蓬戶編氓桑樞賤士膾鱗爲羞采薇代旨恨一饋之已竭欲畢志其奚以亦若奉輿西邁逐子東征入陳綺襦出奉文軒顧行虧而德劣何祿養之足榮矧乃脩短靡恒菴期難越木望秋而先零月既盈而倏魄改載籍之所聞索什一於千百惟太夫人淑慎溫惠含德之貞配沙麓以毓秀孕太陰以儲精冰霜勵其孤操姜孟軻其令名乃生哲嗣翊我

皇明厥嗣伊何曰少傅公惟茲少傅秉德淵冲忠貞
作幹夙夜匪躬履姬公之几爲奏崇伯之膚功皇風
穆其休洽庶類煦以帡幪承帝曰咨繄其有母採璿
珠之英英邇靈源於合浦惟深山與大澤實龍蛇之
所處乃錫華章一品是褒煌煌翟髦猗猗鳳翹階森
蘭玉鼎列麟羔揖綠華與金母嚶瓊蕊兮緋桃旣履
善而順志亦備養以克庖是以心和體適氣謐形延
節匪節而自健翼不沐而長玄百歲厭世翩然上仙
乘雲馭風駕鳳騄鸞緝典姝恩歿而被焉故論德則
駿業著乎寰宇徵養則甘膳窮乎海岫侈榮則崇封

陟乎穹品考終則修齡躋乎上壽蓋往帙之所寥聞而方內之所稀觀者也某等幸承末庇夙藉徽音瞻蘭堂而啓處悼月沒兮珠沉嘉休光之煒燁又易戚而爲欣酌芳醑分列精託柔翰以寫忱爲斯言者一以慰先靈於冥漠一以緩傅相之哀忤

祭封一品嚴太夫人文

國之隆昌必有元臣天壽平格永康兆民家之隆昌必有賢配續嚴女功以正厥內臣勞主逸剛唱柔承代乾施化配坤永貞博觀宇宙邈焉寡倫曰師相翁暨其夫人惟我元翁小心翼翼謨議幃幄基命宥密

忠貞作幹終始惟一夙夜在公不遑退食惟我夫人
式克承之肅肅母訓煌煌令儀絃綖蘋藻筐篚泉絲
居中作範儼以婦師篤生哲嗣異才天挺濟美象賢
篤其忠藎出勤公家入奉晨省義方之訓日夕惟謹
嗟乎國倚於翁翁倚夫人翁家有託國乃用寧我願
翁壽齊於岱華亦願夫人與之並駕何期鸞馭厭世
遽謝譬彼龍劍雄存雌化凡我朝士下及臺輿奔惶
載路吊唁盈閭匪夫人傷實爲翁吁惜哉樊孟今也
則無光光天寵燁燁孫子旣壽且昌載綏繁祉彤管
有輝令聞不已嗟乎夫人固無憾矣靈輶南發祖道

悠悠跂予望之章江之陬白雲紫氣帝里皇州青島
有知庶其來遊

祭秦白崖先生文

吁嗟乎造化無端譬彼蒙倪始余不信今迺知之夫
先生初起海嶼也含菁咀華懷珍抱璞揖班揚掩陸
謝出入銅龍升降金馬此時視九列與三事殆計日
而可躋躋無幾何素絲見緇嫫顏蒙垢遂使威鳳之
羽將摩霄而遽跼逸驕之足望長路而中隕一信一
訕誰其尸之及其暮年身栖林壑名重巖廊於是龍
光賁於丘園逸駕返乎宣室先生方將畏此簡書肅

征戒兩而闕庭未覲高車已摧賀者未歸吊者隨至
一出處又誰驅之假令先生上無汲援下無推轂
謝安之詔不下於東山蒙叟之舟得藏於巨壑則先
生必且終老林泉從容正寢何致委棄親昵畢命路
隅一生一死又誰使之嗚呼昔人有言天地蘧蘆耳
奚足怪乎界之何豐攫之何匱修乎何忻促乎何懟
賈生覩鵬而長悲尼父覩麟而興問豈崇替之所繇
在聖智而猶蔽唯冥契以達觀乃昭晰而不昧某等
夙承芳譽遙藉德音託交令弟比翼詞林聽鶴鴒之
哀噉傷連枝之半傾乃寄辭於柔翰託生芻以寫忱

先考觀瀾公行略

先君諱文明字治卿別號觀瀾高祖唐妣沈氏曾祖
旺妣王氏祖懷葛公誠妣聶氏父東湖公鎮妣李氏
懷葛公以下俱 贈特進光祿大夫云云大學士聶
以下俱贈一品夫人其先鳳陽定遠人也始祖關係
國初以軍功授歸州守禦千戶所千戶至懷葛公以
別支徙居郡城懷葛公陰行善施德於人不食其報
身自作苦得錢卽以周貧乏或施僧供家無餘財有
識鑒雖口吃而其言皆足爲訓里中父老稱爲謇子
每舉其言以訓戒諸子弟必曰張謇老云云其見敬

信如此。謇祖生三子，長鉞，仲卽鎮季。鉞能治生，饒於財。鉞業儒，爲邑庠生，鎮豪宕，任俠不事生產。又弗業儒，然謇祖顧獨愛之。踰於伯季遠甚。及鎮生先君，謇祖乃曰：「吾平生濟人多矣，後世必有興者，其在此兒乎？」長而白皙，修美，宗室有欲以女妻之者。謇祖曰：「吾以此兒大吾宗，何用婦人貴乎？」卒不許。弱冠補郡庠，聞西少華許君督學楚中，試居高等，選郡中士才質尤異者別居書院肄業。先君與焉。其後院中士先後皆取科甲貴顯。于時先君乃獨七舉不第。嘉靖癸丑，不肖以翰林編修三年秩滿例得 貤封先君乃

歎曰吾東後業儒四十年矣自視非後于人也今困
厄至此命也夫遂就封爲書語不肖曰吾所未遂者
盡屬汝矣甲寅不肖以病謝歸前後山居者六年有
終焉之志先君居忽忽不樂日見憔悴不肖竊怪之
因親友以探意先君言吾平生志願未遂望吾兒樹
立用顯吾祖今顧若此吾復何望不肖不得已復出
先君乃大喜爲益一餐焉然自是不復奉晨夕矣後
不肖幸以先君所訓經術得侍 穆宗於潛邸繼入
中書叅大政先君又爲書戒不肖汝平生恒以古人
自期今旣遇明時輔 英主勉之母負夙心隆慶庚

年以不肖一品三年滿考益封久之凡三益封至今
官 今上踐祚之三年忽一日問左右曰張先生父
母在乎左右對言先生父母俱年七十餘固無恙也
上喜甚以 璽書諭不肖曰聞先生父母俱存年各
古稀康健榮享朕心喜悅特賜大紅蟒衣一襲銀錢
二十兩又玉花墜七件彩衣紗六疋乃奉 聖母恩
賜咸宜欽承著家僮往賫之先君捧讀 聖諭叩頭
流涕曰吾兒非吾有矣病中猶手自作家書遣使來京
對之彊飲食以示健然語及不肖未嘗不流涕也每
書言吾非不思汝但人臣之義鞠躬盡瘁況汝膺

先帝顧託之重 皇上眷倚之隆闔門千指咸受
國恩非捐糜此身何用爲報矧吾尚健愼勿念也不
肖因是不敢言歸祔俟 大禮告成當請告一省覲
乃竟弗逮以至抱恨終天嗚呼痛哉先君幼警敏爲
文下筆立就不復改竄口占爲詩往往有奇句然不
能頻首就繩墨循架礪以是見拙於有司性任真坦
率與人處無貴賤賢不肖咸平心無競不宿仇怨人
亦無怨恨之者嘗誦邵堯夫詩云平生不作皺眉事
世上應無切齒人吾殆庶幾焉喜飲酒善談譚里中
燕會得先君卽終席盡歡自薦紳大夫以至齊民靡

不愛敬有佳酒必延致之或載至就飲其自奉甚約
每食未嘗過二器不肖歲時或間奏綺麗才一著卽
藏之篋中不復用凡服食器物雖至敝壞不以分給
諸子妾媵皆不得衣帛不肖嘗諷之曰大人老矣何
自苦如此且今藏之不過以貽後人耳大人且不敢
用彼爲子孫者何福可以消之先君言吾性適爾豈
爲後人計乎且令後世師吾儉乃所以貽之也然以
周貧困濟艱急則又無所惜云先君生以弘治甲子
十二月十五日卒萬曆丁丑九月十三日時七十有
四矣配封一品夫人趙氏子男四長卽不肖次居敬

郡庠生早卒次居易荊州右衛指揮僉事四川都司
軍政僉書次居謙癸酉舉人女一適郡庠生劉胤桂
孫男十人嗣文癸酉舉人嗣修丁丑一甲第二人翰
林編修嗣允郡庠生嗣哲廕錦衣衛正千戶嗣弼嗣
淵嗣寬嗣信嗣敏嗣惠俱幼曾孫男 以戊寅四月
十六日 勅葬山

處士方田李公行狀

公諱秀字茂實其先揚州江都人也洪武中從珉府
護衛改戍臨安遂家焉公性嚴毅渾朴寡言笑食不
兼味衣不統綺足不躡公門乘馬不入里黨其孝友

得之天性兄弟三人白首怡怡如也子姓恂恂如也少食貧顧能心計以少致蓄然好施其致產輒饒裕而輒以分其諸弟道路橋梁傾圯輒捐貲爲修葺然常自秘不以聞其陰德徧郡內矣嘉靖戊子臨安大饑穀價騰貴有貸粟於公者約豐歲倍償公曰使吾欲射利則數歲之償猶不足以當時值夫有餘不以濟乏非仁也因而利之非義也乃悉發庾賑之所全活甚衆臨安蔣守卒于官索秘器未有稱者公卽出所藏爲守斂郡僚召之以其值富公曰守吾父母也父母有急可利其售乎卒不受值衆咸異之名之義

民矣公輒又自秘弗以伐蓋輕財慕義振人之急自
天性也初公好黃老言及爲善陰攜顏氏家訓呂氏
鄉約諸書皆射履以教子弟必忠厚謹敕恥言人過
尤不喜爭鬪見新銳少年有使氣持人短長引繩排
根者恒下之弗校然少年亦莫敢侮之享年八十云
子遇元登丁未進士從中秘擢拜給事中公移書誠
之曰吾聞老氏稱希言自然大辨若訥吾每誦其言
口不論人得失然汝爲諫官言職也義不當爾

天子置諫諍之臣欲以通壅塞廣聰明也宜日夜思
道天子德意陳善納忠若挾公立威徵文巧詆發

人之陰以快臆吾死不願汝有此名也是時朝廷多
事 天子明察諫臣言事一不稱旨輒條責言路號
爲難稱公恒以爲慮無何嬰疾遂逝公生成化正月
初一日子時卒嘉靖辛亥六月廿二日丑時配葉氏
生丈夫子貳長卽給諫君次調元先公卒女二長適
蕭彥昭次適陳昌言孫男二如瑜如璨公質行如萬
石君木訥如建陵張叔雖潛德不耀而修潔等也余
與給諫同讀書中祕素聞公事記其大郁若此爲立
言者先矢焉

所刻張不岳先生文集卷十七終